

摘藻堂四庫全書薈要

集部

欽定四庫全書薈要卷一萬五千四百五十四

集部

渭南文集卷十四

宋 陸游 撰

容齋燕集詩序

廉宣仲葺其燕居之室曰容齋既成置酒落之舉觴
屬客曰吾聞東郭順子之為人人貌而天清而容物吾
雖不能而竊慕焉諸君以為何如或曰方公盛壯時以
郡文學高第入為博士公卿盡傾名流彥士執贄求見者

肩摩而袂屬車騎雍容行者趨避議論英發聞者傾聽
傲色不至於目嫚言不接於耳方是時容物固無甚難
也及轉徙江湖白首下吏舍於邸者爭席遇於途者相
誰何則公之容固難矣至於罹口語絀吏議少年之喜
謗前輩者闕然成市公猶容之則豈不甚難哉敢問所
以能此者何也宣仲笑曰是亦有道焉可容者吾以其
情容之不可容者吾以其人容之故吾遇客而驩然遇
酒而醺然遇怒罵姍侮如風葉之過吾前候蟲之鳴吾

旁也子欲聞其說乎方子之飲酒也俳諧者箕倨角觝者裸裎子何以不怒豈不以其為此者非嫚耶此吾所謂以其情容之也世有服讒蒐慝習於為惡勇於為不義者誠若可疾矣吾則徐思之曰彼君子邪固不至此彼小人邪此固小人之常而吾以動心則去彼亦無幾何耳此又吾所謂以其人容之也二者可容何所不容而子獨何怪於是坐客媿且歎曰吾儕誠小人哉某在衆人中尤號褊率蓋屢歎也酒酣客皆賦詩而屬某為

敘既不得辭則因以識其媿將覽觀之以自儆焉

京口唱和序

隆興二年閏十一月壬申許昌韓無咎以新番陽守來省太夫人於潤方是時予為通判郡事與無咎別蓋逾年矣相與道舊故問朋遊覽觀江山舉酒相屬甚樂明年改元乾道正月辛亥無咎以考功郎徵念別有日乃益相與遊遊之日未嘗不更相和答道羣居之樂致離濶之思念人事之無常悼吾生之不留又丁寧相戒以

窮達死生毋相忘之意其詞多宛轉深切讀之動人嗚呼風俗日壞朋友道缺士之相與如吾二人者亦鮮矣凡與無咎相從者六十日而歌詩合三十篇然此特其略也或至於酒酣耳熱落筆如風雨好事者從旁掣去他日或流傳樂府或見於僧窗驛壁恍然不復省識者蓋又不可計也潤當淮江之衝予老益厭事思自放於山巔水涯與世相忘而無咎又方用於朝其勢未能遽合則今日之樂豈不甚可貴哉予文雖不足與無咎竝

傳要不當以此廢而不錄也二月庚辰笠澤陸某務觀序

送關漕詩序

李固杜喬臧洪之死士以同死為榮范文正之貶士以不同貶為恥今著作之免歸也御史以風聞言之天子以無心聽之與前事固大異而坐客賦詩或危之何也風俗異也某既列名衆詩之次又承命作序二罪當併按矣乾道六年十二月七日笠澤陸某序

雲安集序

濟南治歷城漢故縣也帶灤水而表歷山其山川雜見於春秋孟子史記諸書舜之遺迹蓋至於今可考士生其間多通儒名卿秀傑之士而以筆墨馳騫相高往往多清麗雄放警絕之詞與山川稱若今夔府連帥王公是已公自少時寓祕閣直晚由尚書郎長三院御史出牧於夔實督硤中十五郡資忠厚故政令簡心樂易故民夷親乃因暇日登臨矚望徘徊太息弔丞相之遺祠

想拾遺之高風醉墨淋漓放肆縱橫實為一代傑作顧夔雖號大府而荒絕瘴癘戶口寡少曾不敵中州一下郡如某輩又以憂患留落九死之餘才盡志衰欲強追逐公後而不可得向使公當承平時為并為雍為鎮為定盡得四方賢士大夫以為賓客相與覽其河關之勝以騁筆力則公衆作森列豈特此而已哉雖然是猶未也必極公之文弦歌而薦郊廟典冊而施朝廷然後曰宜今乃猶嘯詠於荒山野水之濱追前世放逐羈旅之

士而與之友雖小夫下吏或幸得之於庠是可歎歟公
以乾道七年八月移牧永嘉行有日奉節令右從政郎
普慈安高衷公在郡文章若干篇為雲安集且屬通判
州事左承議郎山陰陸某為序十月二十六日序

送范西叔序

乾道壬辰二月予道益昌始識范東叔後月餘遂與東
叔兄西叔為僚於宣威幕府又三月西叔以樞密使薦
趣召詣行在所二君皆中書侍郎榮公孫也昔榮公對

制策於治平爭詔獄於熙寧論河事邊事刑名赦令於
元祐雖用舍或小異而要皆不合故用不極其材以沒
沒又列黨籍其門戶為世排詆諱惡者幾四十年又四
十年而西叔兄弟始復奮發為蜀知名士世之論盛衰
者謂人衆勝天天定亦勝人予獨鄙此說夫盛衰皆天
也人何與焉天將禍人之國則小人得志而君子廢其
將福之也則君子見用而小人絀國有禍福而君子無
屈伸彼區區者乃誠謂天與人以衆寡疾徐為勝負豈

不可悲也哉九月丁丑西叔始東下同舍相與臨漾水
置酒賦詩而屬予為序夫吾曹之望於西叔所以繼榮
公者豈獨爵位隆赫文辭行中朝而已哉雖然予與西
叔皆黨籍家也既以勵西叔亦以自勵且勵吾東叔云

東樓集序

余少讀地志至蜀漢巴剌輒悵然有遊歷山川攬觀風
俗之志私竊自怪以為異時或至其地以償素心未可
知也歲庚寅始泝硤至巴中聞竹枝之歌後再歲北遊

山南憑高望鄴萬年諸山思一醉曲江漢陂之間其勢
無繇往往悲歌流涕又一歲客成都唐安又東至於漢
嘉然後知昔者之感蓋非適然也到漢嘉四十日以檄
得還成都因索在笥得古律三十首欲出則不敢欲棄
則不忍廼敘藏之乾道九年六月二十一日山陰陸某
務觀序

范待制詩集序

石湖居士范公待制敷文閣來帥成都兼制置成都潼

川利夔四道成都地大人衆事已十倍他鎮而四道太
抵皆帶蠻夷且北控秦隴所以臨制捍防一失其宜皆
足致變故於呼吸顧眄之間以是幕府率窮日夜力理
文書應期會而故時巨公大人亦或不得少休及公之
至也定規模信命令施利惠農選將治兵未數月聲震
四境歲復大登幕府益無事公時從其屬及四方之賓
客飲酒賦詩公素以詩名一代故落紙墨未及燥士女
萬人已更傳誦被之樂府弦歌或題寫素屏團扇更相

贈遺蓋自蜀置帥守以來未有也或曰公之自桂林入蜀也舟車鞍馬之間有詩百餘篇號西征小集尤雋偉蜀人未有見者盍請於公以傳屢請而公不可彌年乃僅得之於是相與刻之而屬某為序淳熙三年上巳日朝奉郎成都府路安撫司叅議官兼四川制置使司叅議官山陰陸某序

持老語錄序

持禪師明州鄞人世為士一旦棄髮鬚學佛得法於白

牛卿初住餘姚法性數年忽謝去越牧欲以雍熙邀致
疑不就試一問之師欣然曰願即得檄牧大喜師懷負
包笠即日徒步入院秉節如金石說法如雷霆雖從之
遊者不過四五十輩而名震吳越盡交一世名卿賢大
夫予先君會稽公知之最深予時甫數歲侍先君旁無
旬月不見師至今想其抵掌笑語瞭然在目前夷粹真
率真山林間人也後又徙居雪竇護聖二山年德益高
如徑山杲公輩皆以丈人行尊事之其滅也談笑如平

時蓋以真率為佛事者邪得法弟子子詢行光如寂廣
懃或出世說法或遁迹衆中皆不幸早逝去而法揚用
璋獨在揚於是亦住護聖歸然為鼓林耆宿璋老且病
猶自力刻師語錄且合辭屬予為序師可謂有子矣予
以先君故不敢辭淳熙六年五月二十五日山陰陸某
序

師伯渾文集序

乾道癸巳予自成都適犍為識隱士師伯渾於奢山一

見知其天下偉人予既行伯渾餞予於青衣江上酒酣
浩歌聲搖江山水鳥皆驚起伯渾飲至斗許予素不善
飲亦不覺大醉夜且半舟始發去至平羌酒解得大軸
於舟中則伯渾醉書紙窮墨燥如春龍奮蟄奇鬼搏人
何其壯也後四年伯渾得疾不起子懷祖集伯渾文章
移書走八千里乞余為序嗚呼伯渾自少時名震秦蜀
東被吳楚一時高流皆尊慕之願與交方宣撫使臨邊
圖復中原制置使并護梁益兵民皆巨公大人聞伯渾

名將聞於朝而卒為忌者所沮夫伯渾既決不肯仕即
無沮者不過有司歲時奉粟帛牛酒勞問極則如孔叵
徐復輩賜散人號書其事於史而已於伯渾何失得而
忌已如此鄉使伯渾出而事君為卿為公則忌者當益
衆排擊沮撓當不遺力徙比景輸左校殆未可知安得
如在谿山躬耕婦織放意山水優游以終天年邪則伯
渾不遇未見可憾或曰伯渾之才氣空海內無與比其
文章英發鉅麗歌之清廟刻之彝器然後為稱今一不

得施顧退而為山巔水涯娛憂紓悲之言豈不可憾哉
予曰是則有命識者為時惜不為伯渾歎也淳熙某月
某日山陰陸某序

晁伯咎詩集序

傳密居士東里晁公伯咎詩四百六十有一篇其孫教
授君百談集為四卷以授予請序卷首伯咎少以文學
稱自其諸父景迂具茨先生皆歎譽之諸公貴人亦往
往聞其名顧黨家不敢取靖康之元黨禁解伯咎召為

開封掾且顯用矣阻兵不能造朝比乘輿過江中原方
兵連不解士大夫多以甲兵錢穀進故家名流乃見謂
不切事機伯咎落江湖者數年久之雖起乘傳嶺海復
坐微文斥卒棄不用以死而伯咎傲睨憂患不少動心
方扁舟往來吳松嘯歌飲酒益放於詩其名章秀句傳
之士大夫皆以為有承平臺閣之風蓋晁氏自文元公
以大手筆用於祥符天禧間方吾宋極盛時封泰山禮
百神歌頌德業冶金伐石極文章翰墨之用汪洋渟渟

五世百餘年文獻相望以及建炎紹興公獨殿其後又
少時所交皆中州名勝講習磨礪之益深矣是豈宴書
生聞見局陋者敢望其涯哉伯咎學問贍博胸中恢疎
勇於為義視死生禍福無如也至他文亦皆豪奇不獨
其詩可貴尚力求而盡傳之伯咎諱公邁仕至某官淳
熙七年十一月十七日山陰陸某序

長短句序

雅正之樂微乃有鄭衛之音鄭衛雖變然琴瑟笙磬猶

在也及變而為燕之筑秦之缶塞外之琵琶箏篴則又
鄭衛之變矣風雅頌之後為騷為賦為曲為引為行為
謠為歌千餘年後乃有倚聲製辭起於唐之季世則其
變愈薄可勝歎哉予少時汨於世俗頗有所為晚而悔
之然漁歌菱唱猶不能止今絕筆已數年念舊作終不
可捨因書其首以識吾過淳熙己酉炊熟日放翁自序

徐大用樂府序

古樂府有東武吟鮑明遠輩所作皆名千載蓋其山川

氣俗有以感發人意故騷人墨客得以馳騁上下與荆
州邯鄲巴東三峽之類森然竝傳至於今不泯也吾友
徐大用家本東武呼吸食飲於邾淇之津蓋有以相其
軼思者故自少時文辭雄於東州比南歸以政事議論
顯聞薦紳顧不肯輕出其文以沽世取富貴三十年猶
屈治中別駕澹然莫測涯涘獨於悲懽離合郊亭水驛
鞍馬舟楫間時出樂府辭贍蔚頓挫識者貴焉或取其
數百篇將傳於世大用復不可曰必放翁以為可傳則

幾矣不然姑止予聞而歎曰溫飛卿作南鄉九闕高勝
不減夢得竹枝訖今無深賞音者予其敢自謂知君哉
獨感東武山川既墮北敵中而大用之才久伏不耀故
為之一言紹熙五年三月庚寅笠澤陸某務觀序

呂居仁集序

天下大川莫如河江其源皆來自蠻夷荒忽遼絕之域
累數萬里而後至中國以注於海今禹之遺書所謂岷
積石者特記禹治水之迹耳非其源果止於是也故爾

雅謂河出崑崙虛而傳記又謂河上通天漢甚至蜀窮
江源則自蜀岷山以西皆岷山也地斷壤絕不復可窮
河江之源豈易知哉古之學者蓋亦若是惟其上探處
義唐虞以來有源有委不以遠絕不以難止故能卓然
布之天下後世而無媿凡古之言者皆莫不然自漢以
下雖不能如三代盛時亦庶幾焉宋興諸儒相望有出
漢唐之上者迨建炎紹興間承喪亂之餘學術文辭猶
不愧前輩如故紫微舍人東萊呂公者又其傑出者也

公自少時既承家學心體而身履之幾三十年仕愈躋學愈進因以其暇盡交天下名士其講習探討磨礱浸灌不極其源不止故其詩文汪洋閎肆兼備衆體間出新意愈奇而愈渾厚震耀耳目而不失高古一時學士宗焉晚節稍用於時在西掖嘗兼直內庭草趙丞相鼎制力排和戎之議忤秦丞相檜秦公自草日歷載公制辭以為罪而天下益推公之正公平生所為詩既已孤行於世嗣孫祖平又盡裒他文凡若干首為若干卷而

屬某為序某自童子時讀公詩文願學焉稍長未能遠
遊而公捐館舍晚見曾文清公文清謂某君之詩淵源
殆自呂紫微恨不一識面某於是尤以為恨則今得託
名公集之首豈非幸歟慶元二年九月既望中大夫提
舉建寧府武夷山沖佑觀山陰陸某謹序

佛照禪師語錄序

拙庵禪師以佛法際遇孝宗皇帝問會之語既刻金石
傳天下久矣晚菴居阿育王山中其徒相與盡哀五會

所說法凡數萬言為五卷遣侍者正球走山陰澤中請
某作序某曰拙庵之道棟梁大法無語可也拙菴之語
雷霆百世無錄可也又何以序為哉然五會之外別有
一會數萬言之外別有一句是可錄是不可錄諸人試
下語若也道得老農贊歎有分慶元三年九月壬子陸
某謹序

趙祕閣文集序

漢孝武帝好文淮南王安以高帝孫為諸侯王而學問

文辭在漢庭諸儒甲乙中其所著大小山至與雅頌離
騷竝魏陳思王唐太白長吉則又以帝子及諸王孫落
筆妙古今冠冕百世河出崑崙虛首四瀆經天下以入
于海彼源委固自不同無足異也宋興宗室深居宮中
不與外庭接故雖博學軼材不得著見然以詩文飛白
書詔藏祕府者亦不乏人熙寧元豐間始與群臣竝進
於朝積數十年而德麟伯山屬文英妙寢見推於諸公
間矣漢王五世孫祕閣公諱不拙字若拙少以進士奮

主司及流輩皆伏其工初苦貧無以養乃教授諸生以自給其勤苦殆有非婁人子所堪者既得第猶不廢也晚入蜀為州遂持使者節學益不厭文益妙予行南充閬中小益至成都歷山郵津亭及浮屠老子之廬見穹碑巨板多公遺文每觀之至忘食已而故尚書孫公仲益端明汪公聖錫侍御王公龜齡文益出於世往往見公名字於其間許與甚至然後知天下自有公論也公之子善發善零皆取世科善發字正己尤以文學稱其

為漢州判官也囊公之文萬里請予於山陰澤中曰願
有以冠篇右顧公平生知已久已凋落予材下徒以後
死不得讓媿可量哉慶元六年三月丁巳中大夫直華
文閣致仕賜紫金魚袋山陰陸某序

方德亨詩集序

詩豈易言哉才得之天而氣者我之所自養有才矣氣
不足以御之淫於富貴移於貧賤得不償失榮不蓋媿
詩由此出而欲追古人之逸駕詎可得哉予自少聞甫

陽有士曰方德亨名豐之才甚高而養氣不撓呂舍人
居仁何著作搢之皆屈行輩與之遊德亨晚愈不遭而
氣愈全觀其詩可知其所養也既歿若干年待制朱公
元晦以書及德亨之詩示予於山陰白子為我作德亨
集序往時有方昀者與德亨同族為予言德亨遇疾卒
於臨安逆旅垂困猶能起坐正衣冠手自作書與其族
人官臨安者使買棺棺至乃歿色辭不異平日非養氣
之全能如是乎請以是為序慶元六年四月丁酉山陰

陸某序

會稽志序

昔在夏禹會諸侯於會稽歷三千歲而我高宗皇帝御
龍舟橫濤江應天順動復禹之跡駐蹕彌年定中興之
業羣盜削平強敵退遁於是用唐幸梁州故事陞州為
府冠以紀元大駕既西幸而府遂為股肱近藩稱東諸
侯之首地望蓋視長安之陝洛汴都之陳許所命牧守
皆領浙東安撫使其自丞相執政來與去而拜丞相執

政者不可遽數而又昭慈聖烈皇后及永祐以來四陵攢殿相望於鬱葱佳氣中朝謁之使臚銜轂擊中原未清今天下鉅鎮惟金陵與會稽耳荆揚梁益潭廣皆莫敢望也則山川圖謀宜其廣載備書顧未暇及者縣數十年大卿沈公作賓待制趙公不迹繼為守皆慨然以為已任乃與通判軍士施君宿安撫司幹辦公事李君兼韓君茂卿及郡士馮景中邵持正陸子虞王度朱鶴等上參禹貢下考太史公及歷代史金匱石室之藏旁

及爾雅本草道釋之書稗官野史所傳神林鬼區幽怪
恍惚之說秦漢晉唐以降金石刻歌詩賦詠殘章斷簡
靡有遺者若父老以口相傳不見於文字者亦間見層
出積勞累月乃成是雖本之圖經圖經出於先朝非藩
郡所可附益乃用長安河南成都相臺之比名會稽志
會稽為郡雖遷徙靡常而郡本以山得名又禹所巡也
故卒以名之而屬某為之序嘉泰元年二月庚子中大
夫直華文閣致仕陸某謹序

渭南文集卷十四

謹案卷十二第二頁前四行手縮裏以逡巡刊本
裏訛褒今改

卷十三第十二頁後二行賊蹤跡益露刊本蹤訛
縱今改

卷十四第十五頁前五行然以詩文飛白書刊本
飛訛非今改



總校官進士臣胡榮

校對官編修臣裴謙

謄錄監生臣范樹

欽定四庫全書薈要

集部

渭南文集卷十

五至
七

詳校官助教臣謝登雋



欽定四庫全書薈要卷一萬五千四百五十五

集部

渭南文集卷十五

宋 陸游 撰

施司諫註東坡詩序

唐虞賡歌夏述禹戒作歌商周之詩皆以列於經
故有訓釋漢以後詩見於蕭統文選者及高帝項羽韋
孟楊惲梁鴻趙壹之流歌詩見於史者亦皆有註唐詩
人最盛名家者以百數惟杜詩註者數家然槩不為識

者所取近世有蜀人任淵嘗註宋子京黃魯直陳無已
三家詩頗稱詳贍若東坡先生之詩則援據閎博指趣
深遠淵獨不敢為之說某頃與范公至能會於蜀因相
與論東坡詩慨然謂予足下當作一書發明東坡之意
以遺學者某謝不能他日又言之因舉二三事以質之
曰五畝漸成終老計九重新掃舊巢痕遙知叔孫子已
致魯諸生當若為解至能曰東坡竄黃州自度不復收
用故曰新掃舊巢痕建中初復召元祐諸人故曰已致

魯諸生恐不過如此耳某曰此某之所以不敢承命也
昔祖宗以三館養士儲將相材及官制行罷三館而東
坡蓋嘗直史館然自謫為散官削去史館之職久矣至
是史館亦廢故云新掃舊巢痕其用字之嚴如此而鳳
巢西隔九重門則又李義山詩也建中初韓曾二相得
政盡收用元祐人其不召者亦補大藩惟東坡兄弟猶
領宮祠此句蓋寓所謂不能致者二人意深語緩尤未
易窺測至如車中有布乎指當時用事者則猶近而易

見白首沉下吏綠衣有公言乃以侍妾朝雲嘗歎黃師
是仕不進故此句之意戲言其上僭則非得於故老殆
不可知必皆能知此然後無憾至能亦大息曰如此誠
難矣後二十五年某告老居山陰澤中吳興施宿武
子出其先人司諫公所註數十大編屬某作序司諫公
以絕識博學名天下且用工深歷歲久又助之以顧君
景蕃之該洽則於東坡之意蓋幾可以無憾矣某雖不
能如至能所託而得序斯文豈非幸哉嘉泰二年正月

五日山陰老民陸某序

達觀堂詩序

朝請郎致仕吳公景先少嘗從洛川先生朱公希真問道朱公為名所居堂曰達觀手書以遺之且賦詩一章屬之曰子為人深靜簡遠不富貴必壽考故吾以此事相期景先出仕五十年不求速化不治生產位僅至二千石晚為東諸侯客遂引年以歸距八十不遠望其容貌不腴不瘠視聽步趨如五六十人非得朱公密傳親

付殆不能爾朱公之逝甚異世以為與尹先覺譙天授
蘇養直俱解化僊去則吾景先亦其流亞歟自朱公賦
詩後士大夫繼作凡若干篇屬予為序嘉泰二年十一
月癸丑放翁陸某務觀序

梅聖俞別集序

宛陵先生遺詩及文若干首實某官李兼孟達所編輯
也先生當吾宋太平最盛時官京洛同時多偉人巨公
而歐陽公之文蔡君謨之書與先生之詩三者鼎立各

自名家文如尹師魯書如蘇子美詩如石曼卿輩豈不足垂世哉要非三家之比此萬世公論也先生天資卓偉其於詩非待學而工然學亦無出其右者方落筆時置字如大禹之鑄鼎練句如后夔之作樂成篇如周公之致太平使後之能者欲學而不得欲贊而不能況可得而譏評去取哉歐陽公平生常自以為不能望先生推為詩老王荆公自謂虎圖詩不及先生包鼎畫虎之作又賦哭先生詩推仰尤至晚集古句獨多取焉蘇翰

林多不可古人惟次韻和陶淵明及先生二家詩而已
雖然使本無此三公先生何歎有此三公亦何以加秋
毫於先生予所以論載之者要以見前輩識精論公與
後世妄人異耳會李君來請予序故書以予之嘉泰三
年正月己卯山陰陸某序

楊夢錫集句杜詩序

文章要法在得古作者之意意既深遠非用力精到則
不能造也前輩於左氏傳太史公書韓文杜詩皆熟讀

暗誦雖支枕據鞍間與對卷無異久之乃能超然自得
今後生用力有限掩卷而起已十亡三四而望有得於
古人亦難矣楚人楊夢錫才高而深於詩尤積勤杜詩
平日涵養不離胸中故其句法森然可喜因以暇戲集
杜句夢錫之意非為集句設也本以成其詩耳不然火
龍黼黻手豈補綴百家衣者邪予故為表出之以告未
深知夢錫者嘉泰三年正月丁亥笠澤陸某序

陸伯政山堂類稿序

古之學者始於家塾鄉校而貢於天子之辟雍始於抱
關擊柝而至於公卿始於賦物銘器師旅會盟之辭而
至於陳謨作誥其所遇雖不同然於明聖人之道闡性
命精微之理則一也周衰道術裂於百氏士各以所見
著書授徒於是稽之堯舜禹文王周公孔子之遺書始
有大不合者今六經散缺不全而諸子之書則往往具
在又其辭怪偉辯麗足以動蕩世之耳目乃欲學者之
文辭一合於道而不悖戾於經可謂難矣吾宗伯政諱

煥之唐丞相文公希聲之九世孫文公上距丞相元方
五世中間子孫遇五季之亂獨不失譜至今世次皆可
序述伯政家世為儒力學篤行至老不少衰所為文皆
本六經無一毫汨於釋老雖其徒有從之求文者伯政
尊所聞猶毅然不為之貶至如楊公時近世名儒獨以
立論少入釋老伯政正色斥之不遺餘力使死而有知
吾伯政有以見周公孔子矣其孤集遺文為二十卷來
請余為序伯政之文可稱述者衆余獨言其學術文辭

之正以序之尚不失斯人之本意又進其子孫云嘉泰四年二月丁巳笠澤陸某謹序

普燈錄序

粵自曠大劫來至神應迹開示天人未有不以文字語言相授者今七佛偈是其一也至於中夏則三十萬年之前包犧氏作已畫八卦造書契矣釋迦之興固亦無異今一大藏教可謂富矣乃獨於最後舉華示其上足弟子迦葉迦葉欣然一笑不立文字不形言語謂之正

法眼藏師舉華而傳弟子一笑而受既書之木葉旁行之間矣亦未見其與古聖異也豈謂之文而非文謂之言而非言邪昔有景德傳燈三十卷者蓋非文之文非言之言也此門一開繼者相望其尤傑立者續燈廣燈二書也然皆草創簡略自為區別雖聖君賢臣之事有不能具載者獨旁見間出於諸祖章中識者以為恨吳僧正受始著普燈凡十有七年成三十卷前日之恨毫髮無遺矣而尤為光明崇顯者我祖宗之明詔睿藻裒

集周悉一一皆有據依足以傳示萬世寶為大訓其有
功於釋門最大方且上之御府副在名山而又以其副
示某俾得紀述梗槩於後某自隆興距嘉泰五備史官
今雖告老待盡山澤猶於祖宗遺事思以塵露之微仰
足山海不自知其力之不逮也嘉泰四年三月乙酉太
中大夫充寶謨閣待制致仕山陰縣開國子食邑五百
戶賜紫金魚袋陸某謹序

澹齋居士詩序

詩首國風無非變者雖周公之豳亦變也蓋人之情悲憤積於中而無言始發為詩不然無詩矣蘇武李陵陶潛謝靈運杜甫李白激於不能自己故其詩為百代法國朝林逋魏野以布衣死梅堯臣石延年棄不用蘇舜欽黃庭堅以廢絀死近時江西名家者例以黨籍禁錮乃有才名蓋詩之興本如是紹興間秦丞相檜用事動以語言罪士大夫士氣抑而不伸大抵竊寓於詩亦多不免若澹齋居士陳公德召者故與秦公有學校舊自

揣必不合因不復與相聞退以文章自娛詩尤中律呂
不怨不怒而憤世疾邪之氣凜然不少回撓其不坐此
得禍亦僅脫爾及秦氏廢始稍起為吏部郎為國子司
業祕書少監遽沒於官後四十餘年有子知津為高安
守最其詩得三卷屬某為序某少識公於山陰方公召
還嘗以詩贈別及公為郎時故相湯岐公一日語公曰
陸務觀別君詩方傳世非公之賢何以發其語如此時
紹興己卯歲也因高安之請重以感歎某於是年八十

有一矣開禧元年九月太中大夫寶謨閣待制致仕山陰縣開國子食邑五百戶賜紫金魚袋陸某序

傳給事外制集序

國家自崇寧來大臣專權政事號令不合天下心卒以致亂然積治已久文風不衰故人材彬彬進士高第及以文辭進於朝者亦多稱得人祖宗之澤猶在黨籍諸家為時論所貶者其文又自為一體精深雅健追還唐元和之盛及高皇帝中興雖披荆棘立朝廷中朝人物

悉會於行在雖中原未平而詔令有承平風識者知社稷方永太平未艾也故給事中傅公以是時典西省文書得名尤盛公天資忠義絕人自東兵虐焰日熾建炎中大駕南渡方吞噬不遺力幾犯屬車之塵公眇然書生位未通顯獨涕泗感激請提孤軍橫遏其衝衛乘輿論功埒諸大將及駐驛會稽公遂為浙東帥始隱然有大臣望雖擯斥不容而士論愈歸及在東省御史力詆去之然猶知公為一代大儒蓋公論不可揜如此公遺

文百餘卷嗣孫穉貧甚手自鈔錄以傳後世未能竟乃
先緝外制數百篇屬某為序公之文固天下所願見而
取法某未成童時公過先少師每獲出拜侍立被公教
誨詎今七十餘年幸猶後死得論序公文亦幸矣某聞
文以氣為主出處無媿氣乃不撓韓柳之敵世所知
也公自政和訖紹興閱世變多矣白首一節不少屈於
權貴不附時論以苟登用每言敵言畔臣必憤然扼腕
裂皆有不與俱生之意士大夫稍有退縮者輒正色責

之若讐一時士氣為之振起今觀其制告之詞可槩見也公諱崧卿字子駿於淳賢哉開禧元年九月某日太中大夫充寶謨閣待制致仕山陰縣開國子食邑五百戶賜紫金魚袋陸某謹序

聞輦錄序

元豐初置武學先太師以三館兼判學事今學制規模多出於公而策問亦具載家集中後百餘年某從子朴作聞輦錄若干篇論孫吳遺意欲上之朝且乞序於某

某懦且老非能知武事者朴許國自奮之志亦某所愧也乃從其請開禧元年十一月丁卯陸某序

周益公文集序

天之降才固已不同而文人之才尤異將使之發冊作命陳謨奉議則必畀之以閎富淹貫溫厚爾雅之才而處之以帷幄密勿之地故其位與才常相稱然後其文足以紀非常之事明難喻之指藻飾治具風動天下書黃麻之詔鏤白玉之牒藏之金匱石室可謂盛矣若夫

將使之闡道德之原發天地之秘放而及於鳥獸蟲魚草木之情則畀之才亦必雄渾卓犖窮幽極微又畀以遠遊窮處排擯斥疎使之磨礪齟齬瀕於寒餓以大發其藏故其所賦之才與所居之地亦若造物有意於其間者雖不用於時而自足以傳後世此二者造物豈真有意哉亦理之自然古今一揆也大丞相太師益公自少壯時以進士博學宏詞疊二科起家不數年歷太學三館予實定交於是時時固多豪雋不羣之士然落筆

立論傾動一座無敢嬰其鋒者惟公一人中雖暫斥而
玉煙劒氣三秀之芝非窮山腐壤所能湮沒復出於時
極文章禮樂之用絕世獨立遂登相輔雖去視草之地
而大詔令典冊孝宗皇帝猶特以屬公於虐聖主之心
亦如造物非私公以富貴蓋大官重任不極不久則無
以盡公之才也公既薨逾年公之子綸以公遺文號省
齋文稿者屬予為之序公在位久崇論宏議豐功偉績
見於朝廷傳之夷狄者何可勝數予獨論其文者墓有

碑史有傳非集序所當及也開禧元年十二月甲子太
中大夫寶謨閣待制致仕山陰縣開國子食邑五百戶
賜紫金魚袋陸某謹序

宣城李虞部詩序

宣之為郡自晉唐至本朝地望常重來為守者不知幾
人而風流吟詠謝宣城實為之冠生其鄉者幾人而歌
詩復古梅宛陵獨擅其宗此兩公蓋與敬亭之山俱不
磨矣故宣之士多工於文而五七士為尤工唐有李推

官以詩名當代其家傳遺詩得數百篇以詩考之蓋與皮陸同時歟自推官後世世得能詩聲當元豐間有虞部公作詩益工推官清新警邁極鍛鍊之妙而虞部則規模思致宏放簡遠自宛陵出如劉子駿文學不盡與父同議者亦不能優劣之也予得其兩世遺編於虞部之曾孫臨海太守兼字孟達孟達固詩人蓋淵源二祖而能不媿者推官虞部之家世諱字與其學術行治蓋各見於其墓刻家諱予獨志其詩云開禧三年六月丙

年太中大夫寶謨閣待制致仕渭南縣開國伯食邑八
百戶賜紫金魚袋陸某謹序

曾裘父詩集序

古之說詩曰言志夫得志而形於言如臯陶周公召公
吉甫固所謂志也若遭變遇讒流離困悴自道其不得
志是亦志也然感激悲傷憂時閔已託情寓物使人讀
之至於太息流涕固難矣至於安時處順超然事外不
矜不挫不誣不懟發為文辭冲澹簡遠讀之者遺聲利

冥得喪如見東郭順子悠然意消豈不又難哉如吾臨
川曾表父之詩其殆庶幾於是乎予紹興己卯庚辰間
始識表父於行在所自是數見其詩所養愈深而詩亦
加工比予來官臨川則表父已沒欲求其遺書而予蒙
恩召歸至今以為恨友人趙去華彥穰寄表父艇中小
集來曰願序以數十語然表父得意可傳之作蓋不止
此遺珠棄璧識者興歎去華為郡博士尚能博訪之稍
增編帙計無甚難者敢以為請表父諱季狸及與建炎

過江諸賢游尤見賞於東湖徐公嘉定元年二月丁酉
山陰陸某序

送巖電道人入蜀序

王衍一生酣豢富貴乃以口不言錢自高巖電本張氏
子施藥說相不受人一錢乃自稱姓錢以滑稽玩世古
今相反有如此者忽來告放翁言將西入蜀乃書以遺
之他日到青城大峩霧中鵲鳴諸名山見孫思邈朱桃
椎張四郎余朱先生姚小太尉譙天授尹先覺輩有問

放翁安否者可出此卷相與一笑

邢芻甫字序

衛詩美武公之德一章曰瞻彼淇澳綠竹猗猗終之曰
有匪君子終不可諼兮淇大川也見淇而思武公可也
王芻篇竹草之微者亦見而思焉則思之至矣此所謂
終不可諼兮者歟吾友邢子名淇請字於予予復之曰
士之仕者能使一國一邑之人安其政而無怨疾嘲譏
亦已難矣況見其鄉閭而咨嗟追慕豈不甚難哉今衛

人於武公見其地而思之見其草木而思之見其草之
微者如王芻篇竹而思之況遇其子孫又將何如哉人
不我忘於我何加然使人不怨疾嘲譏又咨嗟追慕久
而不忘必有以得之矣故為士者於此不可不知勉也
請字子曰芻甫芻甫勉之仕而使一國一邑之人不忘
相處而使鄉閭黨友不忘相與記其行事以為法傳其
言論風指誦習而勉於善豈不美哉嘉定元年四月己
未山陰陸某序

曾溫伯字序

堯舜去今遠矣其言傳於今者蓋寡惟直而溫與寬而
栗之言再見焉方是時教化之所覃人才之所慕全德
如夔臯陶所言是豈戒其不足哉至商周之間始有得
聖人之清聖人之和者清近直和近溫則既分而為
二矣若漢汲長孺事君無隱天下為之直然去古之全
德又益以遠潁川曾君黯方其入家塾也大父大卿公
用蘇子由張芸叟字其子孫例字之曰溫伯蓋以古全

德訓之有其義而亡其說溫伯請於予曰願有以補之
以終大父之意予慨然歎曰自大卿至溫伯三世傳嫡
德亦克肖其有以承此訓矣序其敢辭嘉定元年五月
辛酉山陰陸某序

天童無用禪師語錄序

虛義一畫發天地之祕迦葉一笑盡先佛之傳淨名一
默曾點一唯丁一牛刀扁一車輪臨濟一喝德山一棒
妙喜一竹篋子皆同此關捩但恨欠人承當天童無用

禪師蓋卓爾能承當者未見妙喜大事已畢豈有住山
示衆之語可累編簡哉放翁謂若不投之水火無有是
處惟韓退之所云火其書其語差似痛快又恐退之亦
止是說得耳五百年後此話大行方知無用與放翁却
是同參嘉定元年秋九月丙辰序

陳長翁文集序

漢之文章猶有六經餘味及建武中興禮樂法度繁然
如西京時惟文章頓衰自班孟堅已不能望太史公之

淳深崔蔡晚出遂墮卑弱識者累歎而已我宋更靖康
旣變之後高皇帝受命中興雖艱難顛沛文章獨不少
衰得志者司詔令垂金石流落不偶者娛愛紆憤發為
詩騷視中原盛時皆略可無媿可謂盛矣久而寢微或
以纖巧摘裂為文或以卑陋俚俗為詩後生或為之變
而不自知方是時能居今行古卓然傑立於頽波之外
如吾長翁者豈易得哉其子師文來乞予為長翁集序
乃寓吾歎以慰其子且以慰長翁於地下云長翁高郵

陳氏諱造字唐卿嘉定二年三月丁巳渭南伯陸某務
觀序

渭南文集卷十五

欽定四庫全書薈要卷一萬五千四百五十六

集部

渭南文集卷十六

宋 陸游 撰

成都府江瀆廟碑

淳熙四年
五月一日

自古水土之功莫先乎禹紀其事莫備乎禹貢之篇禹
貢之所載莫詳乎江漢曰岷冢導漾東流為漢又曰岷
山導江某嘗登岷冢之山有泉涓涓出兩山間是為漢
水之源事與經合及西遊岷山欲窮江源而不可得蓋

自蜀境之西大山廣谷谿谷起伏西南走蠻夷中皆岷
山也則江所從來尤荒遠難知而漢過三澁至大別之
麓亦卒附江以達於海故江為四瀆之首三代典祀秩
視諸侯而楚大國亦以為望有事必禱祠焉可謂盛哉
成都自唐有江瀆廟其南臨江唐末節度使高駢大城
成都廟與江始隔歷五代之亂淫昏割裂神弗受職廟
亦弗治宋興乾德三年平蜀越八年當開寶六年有詔
自京師繪圖遣工侈大廟制傑閣廣殿脩廊邃宇聞於

天下慶歷七年故太師忠烈潞公以樞密直學士來作
牧則又築大堂並廟東南以為徹祭飲福之所而廟益
宏麗矣厥後雖屢繕治有司不力寢以大壞上漏旁穿
風雨入屋支傾苴罅苟偷歲月淳熙二年六月今尹敷
文閣待制范公之始至也躬執牲幣祇肅祀事既退讀
開寶中修廟碑惕然改容曰此太祖皇帝之詔敢弗虔
南出登堂見忠烈公之識則又嘆曰潞國予自出也敢
弗嗣始有葺廟意矣會歲旱公潔齋以禱曰三日而雨

且大治祠宇以報如期高下洽足歲以大穰公饒私餘
蠻夷順服乃自三年某月庀工訖四年五月廟成總其
費木以章計者八千一百二十有八竹以箇計者四萬
九千四百七十甃甃釘以枚計者十八萬七千七百二
十有四丹青黝堊以斤計者一萬八十有七梓匠役徒
以口計者二萬三千八百為屋二百有九間墻六千八
百七十尺廟之制度復還開寶慶歷之盛而有加焉於
是府之屬吏來請其刻文麗牲之石且繫以詩詩曰

井絡之躔下應岷山蟠踞華夷江出其間奔蹴三峽放
於荆揚我考禹跡九州茫茫千礎之宮肇自開寶吏靡
嚴恭庭有第草范公來止事神是力廟未克成當食太
息江流東傾於海朝宗廟成公歸與江俱東壯哉湯湯
環我蜀城萬古不竭亦配公名

行在寧壽觀碑

紹興二十年十月詔賜行在三節堂名曰寧壽觀因東
都三節寧壽院之舊也初章聖皇帝建會靈觀實為崇

奉之始至是高宗皇帝方躋天下於仁壽之域尤垂意焉迺命道士蔡君大象知觀事蒙君守亮副之許其徒世守又命中貴人劉君敷典領置吏胥給清衛兵略用大中祥符故事後十年敷遂請棄官專奉寧壽香火詔如所請賜名能真改左右街都道錄仍領觀事實又用至道中內侍洪正一故事上心眷顧每示優假如此然迨今歲月寢久未有紀之金石以侈上賜者紹熙五年六月知觀事冲素大師邵君道俊始礪石來請某為文

傳示後世某實紹興朝士屢得對行殿同時廷臣零落
殆盡某適後死獲以草野之文登載盛事顧不幸歟伏
觀寧壽觀實居七寶山之麓表裏湖江拱輔宮闕前帶
馳道後枕崇阜盡得都邑之勝廣殿中峙脩廊外翼雲
章寶室籤帙富麗浩浩乎道山蓬萊之藏也鐘經二樓
翬飛霄漢飄飄乎化人中天之居也金符象簡羽流畢
集進趨有容肅恭齋法濟濟乎茹靈芝飲沆瀣之衆也
導以霓旌節以玉磬侍者翼從以登講席琅琅乎徹九

天震十方之音也祐陵之御畫德壽重華之宸翰煥乎
河雒之圖書也鴻鐘大鼎華蓋寶劔褚遂良吳道子之
遺跡卓乎祕府之珍怪也榮光異氣夜燭天半所以扶
衛社稷安鎮夷夏者於是乎在非他宮館壇宇可得而
比永惟我高宗皇帝實與三節君自渾沌溟滓開闢之
初赤明龍漢浩劫之前俱以願力應世濟民雖時有古
今迹有顯晦其受命上帝以福天下則合若符券及夫
風御上賓威神在天與三十六帝翱翔太虛三節君亦

與焉時臨熙壇顧享明薦用敷佑於我聖子神孫降福
發祥時萬時億於庠休哉某既述觀之所繇興且繫之
以銘曰

炎祚中否開真人以大誓願濟下民左右虛皇友三真
坐令化國風俗淳乃營斯宮示宿因丹碧岌業天與隣
神君龍虎呵重闥鯨鐘橫撞震無垠錦旛寶蓋高嶙峋
天華龍燭晝夜陳歷載九九符堯仁超然脫屣侍帝晨
遺澤滲漉萬寓均歲豐兵偃無吟呻咨爾衆士嚴冠巾

以道之真治子身服膺聖訓常如新冲霄往從龍車塵
嚴州烏龍廣濟廟碑

山川之祀自唐書以來見於載籍與天地宗廟竝或謂
山川興雲雨澤枯槁宜在秩祀非必有神主之以予考
之殆不然維嶽降神生甫及申山川之神降而為人與
人死而為山川之神一也豈幸而見於經則可信後世
則舉不可信邪柳宗元死為羅池之神其傳甚怪而韓
文公實之張路斯自人為龍廟於潁上其傳尤怪而蘇

文忠公實之蓋二神者所傳雖不可知而水旱之禱卓
乎偉哉不可泯沒則二公亦不得而揜也予適蜀見李
冰張惡子廟於離堆梓潼之山皆血食千載非獨世未
有疑者蓋其靈響暴著亦有不容置疑者矣嚴州烏龍
山廣濟廟之神曰忠顯仁安靈應昭惠王舊碑以為唐
貞觀中人姓邵氏所記甚詳雖幽顯殊隔不可盡質然
神靈動人如羅池變化不測如潁上歷數百年未嘗少
替而朝廷之所褒顯吏民之所奉事亦猶一日此烏可

以幸得哉至於紹興辛巳東海之師羣胡見巨人皆長
丈餘戈戟麾旄出沒煙雲間則相告曰烏龍神兵至矣
或降或遁去無敢枝梧者是又與東晉八公山及慶厯
嘉嶺神之事相埒然彼皆在近境而此獨見於山海阻
絕數千里之外豈不尤異也哉不得韓蘇之文以侈大
其傳而邦人進士沈奐顧以屬筆於某辭卑事偉有足
恨者廼作送迎神詩一章使併刻之實慶元五年十月
甲子也其辭曰

王之生兮值唐初基龍翔於天兮英雄是資獨沉草萊
兮默不得施巉然萬仞兮胸中之奇使得小試兮冒白
刃而搴朱旗丈夫戰死兮固亦其宜死於不遭兮精神
曷歸王亦何懟兮人則為悲烏龍之山兮跨空巍巍築
傑屋兮奉祠釀桂兮羞芝彈瑩篴兮吹參差王捨斯民
兮逝何之錫以祉兮燕及惇嫠歲屬豐兮長無凶饑擁
羽蓋兮駕玉螭時節來饗兮民之依國有征誅兮克相
王師長戈大纛兮肅肅陰威掃平河雒兮前功弗墮隆

名顯爵分永世有辭

德勲廟碑

自古王者經綸草昧戡定亂略必有熊羆之士不貳心
之臣內任心膂之寄外宣股肱之力而廟謨國論密賴
以決實兼將相之任者在我高宗皇帝時有若太師循
忠烈王張公實維其人粵自高宗歷試於外開大元帥
府總天下兵首以山西豪傑入侍帷幄龍飛順動避敵
南渡公則有扶天夾日之功蕭牆釁起羣公暗拱公則

倡勤王復辟之大策氛祲內侵戎馬衝突公則奮却敵
禦侮之奇略巨盜乘間羣兇和附公則建剪除安輯之
成績由是不數年間國勢安強敵人奪氣講和而一二
重將未還宿衛論者咸以為非長久計公則率先請罷
宣撫使事奉朝請章再上引義慷慨於是議始定士大
夫咸謂其得大臣體而高宗亦每謂之腹心舊將又曰
從來待卿如家人又曰是人與他功臣相去萬萬蓋高
宗蹈履艱危身濟大業沉機獨智燭微察遠以為方海

內橫流巡幸四方暴衣露蓋周衛單寡非如中都高拱
蜩蝓蠖濩之居江流阻難海道阨危非如平時安行清
蹕馳道之中不有如公者協心同德均禍福共安危譬
之一家父兄有急子弟不召而自至譬之一身頭目有
患手足不令而自力則天下之計將以誰諉索盜謂絳
侯功臣非社稷臣則社稷臣與功臣果異建炎以來功
臣則有矣至可名社稷臣者非公而誰故國家所以褒
表崇異常出等夷之上非私恩也及配享高宗廟庭其

次偶居其後或者疑焉是不然唐名將前曰英衛後曰
李郭衛公汾陽之勲德巍如泰山終不以姓名次序為
歉欽宗皇帝下詔褒顯故老而范文正實次司馬文正
之下司馬公之賢不過與范公等范公輔政先數十年
聲詩所載以配夔禹而顧乃居次世豈以此為有抑揚
之意哉公之曾孫鎡三世傳嫡長始築廟於居第之東
廟成以高宗御書德勲二大字為廟之名自忠烈以下
為三室忠烈之配曰秦國夫人魏氏漢國夫人章氏第

二室曰少傅公諱子厚配曰漢國夫人蕭氏第三室曰少師公諱宗元配曰楚國夫人劉氏維忠烈王勲業之詳與夫世諱字系官爵葬有碑謚有誥史有傳此不復載顧廟祭宜有歌詩刻於麗牲之碑乃作詩曰

宋傳九聖高宗是承化龍渡江天開中興維忠烈王翼從帝旁捐身棄孥獨當豺狼煙塵未息變生肘腋首倡義師氣沮金石大業復隆退不矜功雪涕引罪身衛行宮國有大難我則出捍功成愈謙將士畏歎既空盜藪

鏖敵淮右柘臯之捷梁楚無寇河雒將平敵畏乞盟亟
上虎符就第王城茂勲明德爛然史冊燕及家國匪王
孰克築廟作主三室同宇歲時奉享豐豆碩俎國有世
臣家有元孫咨爾後人祇栗廟門

泰州報恩光孝禪寺最吉祥殿碑

天下無不可舉之事亦無不可成之功始以果終以不
倦此事之所以舉而功之所以成也海陵通川之間自
建炎後為盜區戰場中雖息兵然猶鬼嘯狐嗥於藜莠

瓦礫中自官寺民廬皆略具爾未幾復有紹興辛巳之禍前日之略具者又踐蹂燔燒滌地而盡乾道淳熙以來中外無事函養滋息且以國力興葺之迄今四十年而城郭屋邑尚未能復承平之舊至於浮圖之廬又非郡縣所急或盛或衰皆在仕者所不問則其舉事若尤難者嗚呼是特不遇浮圖之傑耳信有之未見其果難也泰州報恩光孝禪寺是已寺始為天寧萬壽寺今名蓋用紹興詔書改賜亦火於辛巳之變有祖彥師者復

葺之未成而化中間屢易主者至紹熙中今長老德範
師應轉運陳公損之之請而至寺雖麤建而大役多未
之舉有巨鐘千石方寺壞於兵時樓焚鐘墮扁而不壞
範始至奮曰鐘不壞寺將興之符也吾舉事將自鐘始
乃建樓百尺以棲鐘鐘始鑄歲在乙卯至是三乙卯矣
而樓成人咸異之遂議佛殿殿之役最大度費錢數千
萬見者縮頸曰使可為豈至今日邪範曰不然吾當與
有緣者力成之不敢以難故止已而有居士劉洪首施

錢五百萬施者不勸而集積為四千萬有奇乃伐木於黃岡蔽流而下方役之興以關征為懼常平使者王公寧聞之曰斯殿以資永祐陵在天之福孰敢議者吾當任其事於是所至皆為弛禁殿以崇成為重屋八楹東西百三十六尺南北九十六尺高百一十尺佛菩薩阿羅漢三十有一軀會王公去而後使者韓公挺取華嚴經語書殿之顏曰最吉祥殿範又為閣六楹以奉今天子昔在潛邸賜前往住持覺深碧雲二大字閣之廣袤雄

麗亦略與殿稱餘若方丈寢堂厨庫水陸堂兩廡累數
十年不能成者皆不淹歲而備最其費為緡錢二十萬
在它人若寢食不遑暇範獨終日從容倡道以進其徒
一警欵一顧視皆具第一義學者往往得入而其師別
峯之法遂盛行於江淮間矣凡一寺內外莫不粲然復
興是殿實為之冠慶元六年夏四月範使其書記蜀僧
祖興來求予作碑予既盡述其始末且為之銘銘曰

海陵奧區名寨中長淮大江為提封於皇徽祖御飛龍

臣民薦福遐邇同是邦巍然千柱宮中有廣殿奉大雄
瓌材蔽江西徂東波神呵護如雲從璇題藻井翔虛空
丹碧髹堊無遺工劫火不能壞鴻鐘雷震鯨吼聲隆隆
層閣閼奉龍鸞蹤榮光夜起騰長虹徽祖聖德齊天宗
澤覃草木函昆蟲咨爾梵衆極嚴恭熙運共慶千載逢
餘福漸被兼華戎長佑農扈消兵烽

洞霄宮碑

造化之初昆侖旁薄一氣既分天積氣於上地積塊於

下明為日月幽為鬼神聚為山嶽海瀆散為萬物萬物
之最靈為人人之最靈為聖哲為僊真而道為天地萬
物之宗幽明鉅細之統此處義黃帝老子所以握乾坤
司變化也其書為易六十四卦道德五千言陰符西昇
度人生神之經列禦寇莊周關喜之書其學者必謝去
世俗練精積神棲於名山喬岳略與浮圖氏同而篤於
父子之親君臣之義與堯舜周公孔子遺書無異浮屠
氏蓋有弗及也臨安府洞霄宮舊名天柱觀在大滌洞

天之下蓋學黃老者之所廬其來久矣至我宋遂與嵩
山崇福宮獨為天下宮觀之首以寵輔相大臣之去位
者亦有以提舉洞霄召拜左相者則其地望之重殆與
昭應景靈醴泉萬壽大一神霄寶籙為比它莫敢望在
真宗皇帝時始制詔改宮名賜金寶牌又賜仁和縣田
十有五頃奉齋醮悉除其租賦至政和間宮以歷歲久
穿壞漫漶徽宗皇帝降度牒三百命兩浙轉運司復興
葺之歲度童子一人為道士建炎中又廢於兵火高宗

皇帝中興大業聞之當宁太息乃紹興二十五年以皇
太后之命建昊天殿鐘樓經閣表以崇閎繚以脩廡費
出慈寧宮梓匠工役具於修內步軍司中使臨護犒賜
踵至既不以命有司而山麓之民亦晏然不知有役一
旦告成金碧之麗光照林谷鐘磬之作聲摩雲霄見者
疑其天降地涌而神運鬼輸也可謂盛矣及上脫屣萬
幾頤神物表遂以乾道二年自德壽宮行幸山中駐蹕
累日勅太官進蔬膳親御翰墨書度人經以賜自有天

地即有此山殊尤之迹未有若此者慶元六年九月葆
光大師宮都監潘三華與知宮事高守中同知宮事水
丘居仁以告山陰陸某曰願有紀以為無窮之傳某以
疾未能屬稿後三年同知宮事王思明與其徒李知柔
杭濤江入東繼以請乃敘載其本末如此且為之銘曰
在宋祥符帝錫之書乃作昭應比隆義圖元豐景靈列
聖攸居元祐上清以祝帝儲棟宇煌煌煥於天衢徽祖
神霄誕彌九區迨我高皇東巡於吳睠言天柱鎮茲行

都警蹕來臨神明翊扶乃御幄殿穆清齋居天日下照
雨露普濡迨今遺民注望屬車三聖嗣興光紹聖謨千
礎之宮騫騰太虛寶磬鴻鐘震於江湖肆作頌詩用紀
絕殊

欽定四庫全書

渭南文集
卷十六

渭南文集卷十六

欽定四庫全書薈要卷一萬五千四百五十七

集部

渭南文集卷十七

宋 陸游 撰

雲門壽聖院記

雲門寺自晉唐以來名天下父老言昔盛時繚山竝谿樓塢重複依巖跨壑金碧飛踊居之者忘老寓之者忘歸遊觀者累日乃徧往往迷不得出雖寺中人或旬月不相覲也入寺稍西石壁峰為看經院又西為藥師院

又西繚而北為上方已而少衰於是看經別為寺曰顯
聖藥師別為寺曰雍熙最後上方亦別曰壽聖而古雲
門寺更曰淳化一山凡四寺壽聖最小不得與三寺班
然山尤勝絕遊山者自淳化歷顯聖雍熙酌煉丹泉闕
筆倉追想葛稚川王子敬之遺風行聽灘聲而坐蔭木
影徘徊好泉亭上山水之樂饜飫極矣而亭之旁始得
支徑逶迤如綫脩竹老木怪藤醜石交覆而角立破崖
絕澗奔泉迅流喊呀而噴薄方暑凜然以寒正晝仰視

不見日景如此行百餘步始至壽聖嶄然孤絕老僧四
五人引水種蔬見客不知拱揖客無所主而去僧亦竟
不知辭謝好奇者或更以此喜之今年予來南而四五
人者相與送予至新谿且曰吾寺舊無記願得君之文
磨刻崖石予異其朴埜而能知此也遂與為記然憶為
兒時往來山中今三十年屋益古竹樹益蒼老而物色
益幽奇予亦有白髮久矣顧未知予之文辭亦能少加
老否寺得額以治平某年某月後九十餘年紹興丁丑

歲十一月十七日吳郡陸某記

寧德縣重修城隍廟記

禮不必皆出於古求之義而稱揆之心而安者皆可舉也斯人之生食稻而祭先嗇衣帛而祭先蠶飲而祭先酒畜而祭先牧猶以為未則凡日用起居所賴者皆祭祭門祭竈祭中雷之類是也城者以保民禁奸通節內外其有功於人最大顧以非古黜其祭豈人心所安哉故自唐以來郡縣皆祭城隍至今世尤謹守令謁見其

儀在他神祠上社稷雖尊特以令式從事至祈禳報賽
獨城隍而已則其禮顧不重歟寧德為邑帶山負海雙
巖白鶴之嶺其高摩天其嶮立壁負者股栗乘者心掉
飛鸞關井之水濤瀾洶湧蛟鰐出沒登舟者涕泣與父
母妻子別已濟者同舟更相賀又有氣霧之毒鼃龜蛇
蠱守宮之蠱郵亭逆旅往往大署墻壁以道出寧德為
戒然邑之吏民獨不得避則惟神之歸是以城隍祠比
也邑尤盛祠故在西山之麓紹興元年知縣事趙君詵

之始遷於此二十八年五月權縣事陳君攄復增築之
高明壯大稱邑人尊祀之意既成屬某為記某曰幽顯
之際遠矣惟以其類可感故古之祭者必思其所嗜好
夫神之所以為神惟正直所好亦惟正直君儻無愧於
此則擷澗谿之毛挹行潦之水足以格神不然豐豆碩
俎是諂以求福也得無與神之意異邪既以勵君亦以
自勵又因以勵邑人八月一日右迪功郎主簿陸某記

濤亭記

潛山道人廣勤廬於會稽之下伐木作亭苦之以茆名之曰潛亭而求記於陸子吾聞鄉居邑處父兄弟相扶持以生相安樂以老且死者民之常也士大夫去而立朝散之四方功名富貴足以老而忘返矣猶或以不得車騎冠蓋雍容於途以夸其鄰里而光耀其族姁為憾惟浮屠師一切反此其出遊惟恐不遠其遊之日惟恐不久至相與語其平生則計道里遠近歲月久暫以相高嗚呼亦異矣勤公之心獨不然言曰吾出遊三十

年無一日不思瀟而適不得歸未嘗以遠遊夸其朋儕
其在瀟亭語則瀟也食則瀟也煙雲變滅風雨晦冥吾
視之若瀟之山樵牧往來老稚嘯歌吾視之若瀟之人
疏一泉移一石藝一草木率以瀟觀之恍然不知身之
客也夫人之情無不懷其故者浮屠師亦人也而忘其
鄉邑父兄弟無乃非人之情乎自堯舜周孔其聖智
千萬於常人矣然猶不以異於人情為高浮屠師獨安
取此哉則吾勤公可謂篤於自信而不移於習俗者矣

故與為記紹興三十年十二月十二日記

煙艇記

陸子寓居得屋二楹甚隘而深若小舟然名之曰煙艇客曰異哉屋之非舟猶舟之非屋也以為似歟舟固有高明奧麗踰於宮室者矣遂謂之屋可不可邪陸子曰不然新豐非楚也虎賁非中郎也誰則不知意所誠好而不得焉麤得其似則名之矣因名以課實子則過矣而予何罪予少而多病自計不能效尺寸之用於斯世

蓋嘗慨然有江湖之思而飢寒妻子之累劫而留之則
寄其趣於煙波洲島蒼茫杳靄之間未嘗一日忘也使
加數年男勝鉏犁女任紡績衣食麤足然後得一葉之
舟伐荻釣魚而賣芰芡入松陵上嚴瀨歷石門沃洲而
還泊於玉笥之下醉則散髮扣舷為吳歌顧不樂哉雖
然萬鍾之祿與一葉之舟窮達異矣而皆外物吾知彼
之不可求而不能不眷眷於此也其果可求歟意者使
吾胸中浩然廓然納煙雲日月之偉觀攬雷霆風雨之

奇變雖坐容膝之室而常若順流放櫂瞬息千里者則
安知此室果非煙艇也哉紹興三十一年八月一日記
復齋記

仲高於某為從祖兄某蓋少仲高十有二歲方某為童
子時仲高文章議論已稱成材冠綬帶博車騎雖容一
時名公卿皆慕與之交諸老先生不敢少之皆謂仲高
仕進且一日千里自從官御史識者惟恐不得如仲高
者為之及其丞大宗正出使一道在他人亦足稱美仕

在仲高則謂之蹉跎不偶可也顧曾不煖席遂遭口語
南遷萬里凡七閱寒暑不得內徙與仲高親厚者每相
與燕遊輒南望歎息出涕因罷酒去如是數矣然客自
海上來言仲高初不以遷謫瘴癘動其心方與學佛者
遊落其浮華以反本根非復昔日仲高矣聞者皆悵然
自以為不足測斯人之淺深也隆興元年夏某自都還
里中始與兄遇視其貌淵乎似道聽其言簡而盡所謂
落浮華反本根者乃親見之嘗對榻語至丙夜謂某曰

吾名吾燕居之室曰復齋子為我記某自念少貧賤仕而加甚凡世所謂利欲聲色足以敗志汨心者一不踐其境兀然枯槁似可學道者然從事於此數年卒無毛髮之得若仲高馳騁於得喪之場出入於憂樂之域而自得者乃如此非深於性命之理其孰能之某蓋將就學焉敢極道本末以為復齋記

青州羅漢堂記

隆興改元秋九月某訪故人奕公於青山之下與奕公

別蓋十有餘年矣聞某至曳杖出迎松間黔瘠腊如殘
雪覆頂相與握手訪問朋舊且悲且喜既至其居脩廊
邃屋曲折皆有意已而入法堂之東室忽見澗壑巖竇
飛泉迅流菩薩阿羅漢翔遊其中使人如身在峩蒼天
台應接不暇奕公從旁笑曰此吾使工人幻為之者也
始王君某築是庵於墓左以資其先人之福而請吾居
焉王君閉門讀書未嘗少貶於世顧於吾獨委曲周盡
吾亦感其意為之留而弗去者十年凡此土木金碧以

為像設供養之具者積費千金王君無絲毫計惜而吾之心志亦竭於是矣子為我記嗚呼某不天少罹閔凶今且老矣而益貧困每遊四方見人之有親而得致養者與不幸喪親而葬祭之具可以無憾者輒悲痛流涕愴然不知生之為樂也聞王君之事既動予心又況奕公勤勤之意乎記其可辭明年七月一日甫里陸某記

鎮江府城隍忠祐廟記

漢將軍紀侯以死脫高皇帝於滎陽之圍而史失其行

事司馬遷班固作列傳弗載也維宋十一葉天子駐蹕
吳會改元乾道正月甲子右中奉大夫直敷文閣知鎮
江府方滋言府當淮江之衝屏衛王室號稱大邦自故
時祠紀侯為城隍神莫知其所以始然實有靈德以庇
其邦之人禱祈禴禳昭答如響紹興隆興之間敵比入
塞金鼓之聲震於江壩吏民不知所為則惟神之歸雖
敵畏天子威德折北不支退舍請盟府以無事至於流
徙蔽野兵民參錯而居處弗驚疾癘以息則神實陰相

之吏其敢貪神之功以為己力乎謹上尚書願有以褒
顯之以慰父兄子弟之心越三月癸丑有詔賜廟額曰
忠祐詔下而方公為兩浙轉運副使右朝散大夫直徽
猷閣呂公擢來知府事侈上之賜五月癸亥大合樂盛
服齊莊躬致上命神人協心霧雨澄霽靈風肅然來享
來臨於是呂公以屬某曰願有紀焉某惟紀侯忠奮於
一時而暴名於萬世功施於漢室而見褒於聖宋身隕
於滎陽而血食於是邦士惟力於為善而已豈有有其

善而不享其報者乎吏之仕乎是邦者必將有事於廟
有事於廟者必將有考於碑其尚知所勉焉毋為神羞
六月癸未記

黃龍山崇恩禪院三門記

自浮屠氏之說盛於天下其學者尤喜治宮室窮極侈
靡儒者或病焉然其成也無政令期會惟太平久公私
饒餘師與弟子四出丐乞積累歲月而後能舉其壞也
無衛守誰何一日寇至則立為草莽丘墟故天下亂則

先壞治則後成予於是蓋獨有感焉黃龍山方南公時
學者之盛名天下而其居亦稱焉中更夷狄盜賊大亂
之後學者散去施者弗至昔之閎壯鉅麗者嘗委地矣
自庚申訖丁亥二十餘年之間乃能粲然復興樓堦殿
閣空翔地踴鐘魚之聲聞十餘里法席之盛殆庶幾南
公時是非兵革之禍不作遠方之氓蕃息阜安得以其
公賦私養之餘及於學佛者則此山且為虎狼魑魅之
所宅矣而安能若是哉禪師升公於其寺門之成也屬

予為記予謂升公方以身任道起其法於將墜門蓋未足言獨書予所感使凡至山中者皆知前日之禍亂嘗如此而國家之覆燾涵育斯民若是其深吏勤其官民力其業相與思報上之施焉升公豈不得所願哉乾道三年正月十四日左通直郎陸某記

王侍御生祠記

乾道七年二月知夔州濟南王公新作貢院成越三月夔歸萬施梁山大寧六郡之士不謀同辭曰夔雖號都

督府而僻在巴硤無贏財羨工公之為是役也寸寸銖銖心計而手度之累月乃成形容為癯髮為盡白其德於士豈有既邪盍思所以報者乃相與築祠於院之東堂畫像惟肖又相與屬予記之予曰公之施厚矣祠未足報也士則曰吾等將日夜勉於學父兄詔子弟於家長老先生訓諸生於鄉期有以應有司之求如是足乎予曰未也郡國貢士於天子天子命近臣與館閣文學之士選其尤者而親策之於廷策既上天子為親第其

名謂之進士進士將相儲也自是而起於朝其任政事
毋伏嘉言毋醜衆正其任言責毋比大吏毋置宵人其
任百執事守節秉誼宿道鄉方毋懷諛毋服讒使天下
稱之史臣書之曰是夔州所貢士也士以是報公公以
是報天子迺可無媿而予於記亦無媿辭矣若何皆曰
唯敢不力乾道七年三月十五日左奉議郎通判軍州
主管學事兼管內勸農事陸某記

東屯高參記

少陵先生晚遊夔州愛其山川不忍去三徙居皆名高
叅質於其詩曰次水門者白帝城之高叅也曰依藥餌
者灤西之高叅也曰見一川者東屯之高叅也故其詩
又曰高叅非一處予至夔數月吊先生之遺迹則白帝
城已廢為丘墟百有餘年自城郭府寺父老無知其處
者況所謂高叅乎灤西蓋今夔府治所畫為阡陌裂為
坊市高叅尤不可識獨東屯有李氏者居已數世上距
少陵財三易主大厯中故券猶在而高叅負山帶谿氣

象良是李氏業進士名襄因郡博士雍君大椿屬予記
之予太息曰少陵天下士也早遇明皇肅宗官爵雖不
尊顯而見知實深蓋嘗慨然以稷卨自許及落魄巴蜀
感漢昭烈諸葛丞相之事屢見於詩頓挫悲壯反覆動
人其規模志意豈小哉然去國寢久諸公故人熟睨其
窮無肯出力比至夔客於栢中丞嚴明府之間如九尺
丈夫俛首居小屋下思一吐氣而不可得予讀其詩至
小臣議論絕老病客殊方之句未嘗不流涕也嗟夫辭

之悲乃至是乎荆卿之歌阮嗣宗之哭不加於此矣少陵非區區於仕進者不勝愛君憂國之心思少出所學佐天子興貞觀開元之治而身愈老命愈大謬坎壈且死則其悲至此亦無足怪也今李君初不踐通塞榮辱之機讀書絃歌忽焉忘老無少陵之憂而有其高少陵家東屯不浹歲而君數世居之使死者復生予未知少陵自謂與君孰失得也若予者仕不能無媿於義退又無地可耕是直有慕於李君爾故樂與為記乾道七年

四月十日山陰陸某記

樂郊記

李晉壽一日圖其園廬持示余曰此吾荊州所居名樂郊者也荊州故多賢公卿名園甲第相望自中原亂始以吳會上流常宿重兵而衣冠亦遂散去太平之文物前輩之風流蓋略盡矣獨吾樂郊日加葺文竹奇石蒲萄來禽芍藥蘭茝菱芡菡萏之富為一州冠其尤異者往往累千里致之子幸為我記予官硤中始與晉壽相

識長身鐵面音吐鴻暢遇事激烈奮發以全軀保妻子
為可鄙其意氣豈不壯哉及為客置酒出佳侍兒陳書
畫琴奕相與娛嬉則雍容都雅風味乃甚可愛雖梁宋
間少年貴公子不能過蓋其多材藝知弛張如此然自
少時不喜媒聲利有官不仕窮園林陂池之樂者且三
十年每自謂泉石膏肓及來夔州諸公始大知之合薦
於朝議者謂晉壽當以少伸於世為喜而晉壽顧不然
獨眷眷於樂郊不忍暫忘嗚呼出處一道也仕而忘歸

與處而不能出者俱是一癖未易是泉石非鐘鼎諸公
之薦蓋矧晉壽膏肓而使為世用異時晉壽成功而歸
高牙在前千兵在後擅畫繡之榮以賁斯園荆楚多秀
民尚有能賦其事者乎乾道七年六月十日笠澤陸某
記

對雲堂記

巫故郡自秦以來見於史其後罷郡猶為壯縣杜少陵
扁舟下白帝過焉為賦歸字韻五字詩詩傳天下由是

巫縣名益重宋建中靖國之元黃太史始脫鉤黨自蜀
之荆訪少陵遺迹客縣治之東堂留字壁間有坐卧對
南陵雲山陰晴變態之語距乾道辛卯逾一甲子無舉
出者鄆城李德修來為令風流儒雅翩翩佳公子因廢
址作堂與客落之舉酒屬山陰陸務觀曰子為予名且
記復興之歲月務觀既取太史語名之且曰僕行年五
十閱世故多矣所謂朝夕百變者奚獨雲山哉一日進
此道幻醫消情塵滅真實相見雖巍乎天地浩乎古今

變壞不停與浮雲遊塵空華青暈初無少異也德修方
吏退時清坐堂上試以僕言觀之德脩名普務觀名某
臘月乙卯之夕大醉中秉燭梅花下記

靜鎮堂記

四川宣撫使故治益昌樞密使清源公之為使也始徙
漢中郎以郡治為府郡自兵火滌地之後一切草創公
至未幾凡營壘廐庫吏士之廬皆築治之使堅壯便安
可以支久而府獨仍其故西偏有便坐日受羣吏謁見

與籌邊治軍燕勞將士靡不在焉而其壞尤甚公既留
三年官屬數以請始稍加葺易其傾撓徹其蔽障不費
不勞挾日而成會上遣使持親詔賜黃金匱寶熏珍劑
以彰殊禮公遂據詔中靜鎮坤維之語名新堂曰靜鎮
而命其屬陸某記之某辭謝不獲命則再拜言曰以才
勝物易以靜鎮物難以靜鎮物惟有道者能之泰山喬
嶽之出雲雨明鏡止水之照毛髮則靜之驗也如使萬
物並作吾與之逝衆事錯出吾為之變則雖弊精神勞

思慮而不足以理小國寡民況任天下之重乎歲庚寅
某自吳適楚過廬山東林山中道人為某言公嘗憩此
院閉戶面壁終夏不出老宿皆愧之則公之剡心受道
蓋非一日矣世徒見公馳騁於事功之會而不知公枯
槁澹泊蓋與山棲谷汲者無異徒見公以才略奮發不
數歲取公輔而不知公道學精深尊德義斥功利卓乎
非世俗所能窺測也而上獨深知之故詔語如此傳曰
知臣莫若君詎不信哉雖然某以為今猶未足見公也

寇橫中原久腥聞於天天且悔旣盡以所覆畀上而公
方弼亮神武紹開中興異時奉鑾駕奠京邑屏符瑞之
奏抑封禪之請却渭橋之朝謝玉關之質然後能究公
靜鎮之美云乾道八年七月二十五日門生左承議郎
權四川宣撫使司幹辦公事兼檢法官陸某謹記



渭南文集卷十七



總校官進士臣胡榮

校對官編修臣裴謙

謄錄監生臣范桐